




Te Avae Me 1959

TE HEHEURAA API

Te Faaamuraahia Te Tiaa Rahi Taata.

(Mataio 14.)

I muri noa iho i to Iesu faarooraa i te parau no te poheraa o Ioane, haere atura oia, na nia i te pahi, i te tahi pae mai o te roto ra, i te hoê vahi medebara. No te rahi o te here o te mau taata rii ia'na, na rave rahi to ratou, no roto mai i te mau oire i fatata mai tei apee atu ia'na, no te mea ua hinaaro ratou i te faaroo faahou i ta'na mau haapili-raa.

A hi'o ai oia i te reira tiaa rahi taata, i ihora oia i te aroha ia ratou, e na faaora oia i to ratou tei roohia i te ma'i. E i te taeraa mai te po, te maere noa ra te mau pipi a Iesu e, e nahea te reira rahiraa taata e ite atu ai i te maa e te vahi taotoraa i roto i te medebara. Haere atura ratou i te f'atu i te na ôraa'tu e, "*E vahi moemoe teie, e ua poto te mahana, e tuu atu i teie nei feia rahi ia haere na i te mau oire rii e hoo i te maa na ratou, no te mea aita ta ratou e maa.*" Parau atura Iesu i ta'na mau pipi, "*Eiaha ratou e haere, na outou e hopoi atu i te maa na ratou.*" Eaha ia te mea tei fatata mai e tia'i ia faaamu i te reira tiaa rahi taata? E pae noa iho pane e e piti noa iho i'a ta te mau pipi. E i te taima i afai-mai-ai ratou i te reira maa ia Iesu, faaue atura oia i te mau taata ia parahi i nia i te mane. Rave ihora oia i na pane e pae. e na i'a e piti ra, vavahi ihora i te reira. E i reira nāuā a'era oia i to'na mata i te ra'i, haamaitai atura i te maa e horoa'tura te reira i ta'ra mau pipi o tei rave atu i te reira e opere atura i te mau taata atoa e parahi noa ra. Tupu atura te hoê mea maere rahi, ua faarahihia te maa. Ua amu te mau taata atoa i reira e pai'a a'era ratou, e ia oti ta ratou amuraa i te naa haaputu ihora te mau pipi i tei toe mai e i a'era na ete rarahi e hoê ahuru e ma piti. Ua tae paha te rahiraa o te mau taata, i taua taima ra, i te pae tausani e te vaira hoi te mau vahine e te mau tamarii.

Aita o Iesu i hinaaro ia parahi te reira rahiraa taata i roto i te medebara i taua po ra. Faaue atura oia i ta'na mau pipi ia haere vitiviti i roto i te hoê pahi no te fano atu i te tahi paeau ra, e na'na e parahi i reira no te faaho-iraa'tu i te mau taata ra. E i muri a'e i to te mau taata

revaraa'tu ua parahi noa oia, o oia ana'e iho, e haere atura oia i nia i te mou'a ia pure.

Ua fano atu te mau pīpī mai ta Iesu i parau atu ia ratou. E i to ratou taeraa i te vahi i ropu i te roto, tupu ihora te mata'i rahi e ua tiria-noa-hia te pahi e te mau mataare. Māta'u ihora te mau pīpī, e a hi'o atu ai ratou i nia i te mau mataare ra ite atura ratou ia Iesu i te haereraa mai ia ratou, te haere uoa rā oia na nia i te mataare ra. Mana'o ihora ratou e, e tupapau teie e haere mai nei ia ratou, e na auē ihora i te māta'u rahi.

Ua parau atura rā Iesu ia ratou, na ô atura, "*A faaitoito, o vau, eiaha e mata'u.*" Ua parau maira Petero ia'na, na ô maira, "*E te Fatu, o oe ra. e parau mai ia'u ia haere atu vau ia oe na nia i te are.*" Parau atura Iesu, "*A haere mai.*" Tei raro atura Petero faarue maira te pahi, haere tia'tura ia Iesu ra na nia i te are. Area, i to'na hi'oraa i pihaiiho ia'na e i to'na iteraa i te u'ana o te mata'i tei faa arepurepu i te mau mataare māta'u ihora oia e te paremo ra oia i raro. Pii atura oia, "*E te Fatu, ia ora vau.*" Ua faatoro atura Iesu i ta'na rima i reira ra, haru maira i ta'na rima e na ô atura, "*E teie nei taata faaroo haraini, eaha oe i mata'u ai?*" Haere atura raua i nia i te pahi. e i te taime i tae atu ai raua i reira, pohe ihora te mata'i e ore atura te miti rahi.

Ua hi'o noa maira te tahi pae o te mau pīpī, tei parahi hoi i nia i te pahi, e ua ite atura ratou i tei tupu ra, e ua huruēhia ratou i te reira. Ua tipapa maira ratou i raro i mua ia Iesu e ua na ô maira, "*E Tamaiti mau ā oe na te Atua.*"

E i reira faaoti a'era te reira mau taata i to ratou mana'o ia faaoti i to ratou tereraa i te haereraa'tu i tera pae mai o te roto ra, e aita i maoro tae atura ratou i te oire iti ra i Genesareta.

I te faaroora te mau taata i parahi i reira, na tae mai o Iesu, e ta'na mau pīpī i to ratou vahi, oaoa ihora ratou e hopoi maira ratou i to ratou tei roohia i te ma'i, e te mau paruparu ma te ani atu e, ia faatiaia noa'tu ratou i to ratou rima i te hiti o to'na ra ahu. E te feia atoa tei na reira ra, na faaorahia ia.

Ua Faaamu Oia I Na Taata E Maha I Te Tausani.

(Mataio 15.)

I pihai atu i Galilea, i te hiti o te Miti Mediteranea te vai ra te oire tahito o Turia. E oire faaetaetahia te reira. E i te pae apatoerau rii o Turia te vai ra te oire ra o Sidona. E mau feia haehaa te mau taata e parahi ra i roto i taua na oire ra e no roto mai hoi i te miti ta ratou imiraa i te maa. Haere atura Iesu ia ratou no te poro atu i te evanelia. A parahi ai oia i reira ua haere mai te hoê vahine ati Kananaa ia'na e na ô atura, "*E te Fatu, e te Tamaiti a Davida, e aroha mai oe ia'u; ua rahi roa te pohe o tau tamahine i te hoê demoni.*"

I te haamataraa aita roa o Iesu i haapao noa a'e ia'na, e i reira haera atura oia i ta'na ra mau pîpî no te tahi maa tauturu iti. Aita roa i taa i te mau pîpî e, eaha râ ratou, no reira haere atura ratou i te Fatu ma te parau atu e, "*A tuu ia'na ia haere na, te pii noa maira oia i muri noa iho ia tatou.*"

Ua parau atura râ Oia, na ô atura, "*Aita vau i tonohia mai i o na maori râ i te mau mamoe ana'e i mo'e i te utuafare o Iseraela.*" Aita â ta'na ohipa, i taua taime ra, i faataahia no te ao atoa nei, no Iseraela ana'e ra. Ua rahi to te reira vahine faaroo e ua ite oia e, e tia i te Fatu ia faaora i ta'na tamahine. Haere faahou atura oia ia'na, tahopu maira ma te parau atu e, "*E te Fatu e, e turu mai oe ia'u.*"

Ua parau atura oia, "*E mea au ore ia rave i te mau a te tamarîi ra a titiri atu ai na te urî.*" Te haapîi atura ra oia ia'na e, ua tonohia mai oia, i taua taime ra, no te utuafare ana'e o Iseraela, e no reira eiaha e tiaturi e, e horoa'tu oia i te tahi ê atu i te mau haamaitairaa te faataahia no Iseraela ra.

Ua taa maitai i taua vahine i te auraa mau o ta'na ra parau, e na roto i te raveraa i te parau tei au atoa'tu i ta'na ra, na ô atu ra oia, "*Oia mau, e te Fatu, te amu nei râ te urî i te hu'a rii maa i mairi no nia i te amuraa a to ratou*

ru mau fatu.” I ihora o Iesu i te aroha ia’na, na ô atura oia, “*E teie nei vahine e! e faaroo rahi to oe; o ta oe i hinaaro na, ia na reirahia oe.*” E mai te reira’tu taine faaorahia a’era ta’na tamahine.

Faarue atura Iesu i te fenua o Turia e o Sidona e haere atura oia i Galilea. Parahi ihora oia i te vahi hau mārû i nia i te mou’a. Aita i maoro faaroo atura te mau taata o te reira mau vahi e, tei reira oia. Ua hinaaro te mau paru-paru, te mau matapo e te mau taria turi o ratou ra, ia faaorahia ratou. Ma te tautururaa o to ratou ra man fetii apee atura ratou ia Iesu i nia i te mou’a e tipapa ihora ratou i mua i to’na ra avae. Faaora ihora oia ia ratou atoa. E haamaitai ihora te mau taata, tei tae i reira e tei ite hoi i te reira mau semeio, i te Atua o Iseraela ra.

E i te taeraa mai o te po ra aita roa te hoê taata i hinaaro atu i te ho’i i to ratou mau fare, ua parahi noa ratou i reira i taua po ra. E ua parahi faahou ratou i reira i te mahana i muri iho, ma te faaroo noa i ta’na mau haapii-raa. E i te tae-faahou-raa mai o te rui ua parahi faahou ratou. E i te mahana i muri iho ani atura Iesu ia haere mai ta’na mau pipi ia’na ra.

Na ô atura oia, “*Te aroha nei au i teie nei feia rahi, i te mea a rui toru a’enei ratou ia’u nei e aita a ratou maa ia amu: e ore au e tuu porori noa ia ratou, oi paruparu noa ratou i te aratia.*” Ua tae ratou i te maha tausani te rahira ma te tai’o atu te vahine e te mau tamarii.

Ani atura Iesu, “*E hea a outou pane?*” ua parau maira ratou, “*E hitu, e na i’a rii.*” I te faaroora te Fatu i te reira parau, faaue atura oia i te mau taata atoa ia parahi ratou i raro i nia i te fenua. Rave atura oia i na pane e hitu ra, e na i’a rii, vavahi ihora oia i te reira. E i muri a’e i to’na haamaurururaa’tu i to’na Metua, faaue atura oia i ta’na mau pipi ia opere atu te reira i te mau taata ra. Ua na reira ratou, e ua rave te mau taata atoa i tei hinaarohia e ratou. E i muri a’e i to ratou amuraa i te reira ua i na ete e hitu i te maa i toe ra. E i teie nei, i muri a’e i to ratou paiaraa, tono atura Iesu ia ratou ia haere atu i to ratou ra mau fare e haere atura oia i te fenua ra o Magadala.

Faaroo atura te mau Pharisea i te parau no to'na taeraa mai e haere atura ratou e ani ramâ ia'na no te faaite mai i te hoê tapao no te faaiteraa mai e, o te Tamaiti mau Oia na te Atua. Na ô atura oia ia ratoa, "*E titau â te ui taata iino e te faaturi i te tapao; aita râ e tapao e horoahia'tu, maori râ te tapao i te peropheta ra ia Iona.*"

O teie ia te tapao no te peropheta ra ia Iona, oia hoi, to'na vairaa i roto i te opu o te i'a rahi no na mahana e na rui e toru ra, e e na reira atoa o Iesu. e vai ia oia i roto i te menema no na mahana e toru i muri a'e i to'na poheraa. Aita roa te reira parau i taa i te mau Pharisea ra.

E i te taime a vai noa'i te Faaora, oia ana'e e ta'na ra mau pîpî, fariu atura oia ia ratou e na ô atura, "*E faaitoitoe, e ara i te faahopue a te mau Pharisea e te mau Sadukea.*" E aita roa ratou i taa noa'tu i te auraa o te reira parau. Ua aramoinahia ia ratou i te afai mai i te pane e o ratou ra, e te maere noa ra ratou e, e ere anei te opanihia râ ratou e, eiaha e hoo atu i te maa nō ō mai i te mau Pharisea e te mau Sadukea ra.

E i to te Fatu faaroora eaha ta ratou e parau iho ra, na ô atura oia, "*E te feia faaroo tapetepete e, eaha outou i feruri noa'i i roto ia outou iho, i te mea aore outou i rave atoa mai i te pane? Aitâ outou i ite e? e aore e haamana'o i na pane e pae e na tausani hoi e pae ra, e na ete rarahi ta outou i faai i te toea maa ra? E na pane hoi e hitu e na tausani e maha ra, e na ete hoi ta outou i faai ra? Eaha hoi outou i ore i ite ai, e ere i to te maa te parau ta'u i parau atu ia outou na e, e ara i te faahopue a te mau Pharisea e te Sadukea?*"

I reira te taaraa ia ratou e, te faaara râ oia ia ratou i te mau haapiiraa a taua mau taata ra. E i te tahi atu â mau taime ua faaara'tu oia ia ratou i te mau orometua haavare e e te mau peropheta haavare ra. Te ora nei te tahi pae o ratou i rotopu ia tatou i teie nei, e e tano atoa ia tatou te faaararaa ta te Fatu i horoa'tu i te mau taata tei pee atu ia'na ra.

Marcel Bonnet

LES "ARTICLES DE FOI"

Les croyances et les pratiques prescrites par la plupart des sectes religieuses sont présentées d'habitude sous forme de credos. Les Saints des Derniers Jours ne proclament aucun credo de ce genre comme code complet de leur foi, car ils acceptent le principe des révélations continuelles, qui est un trait essentiel de leur croyance. Joseph Smith, premier prophète divinement commissionné et premier président de l'Eglise de Jésus-Christ dans la dispensation courante, présente, en guise de sommaire des principes de l'Eglise, les treize professions connues sous le nom de "Articles de Foi de l'Eglise de Jésus-Christ des Saints des Derniers Jours". Ceux-ci renferment des doctrines fondamentales et caractéristiques de l'Evangile tel qu'il est enseigné par cette Eglise; mais on ne doit pas les considérer comme un exposé complet de notre croyance, car, comme l'affirme l'article 9, "Nous croyons tout ce que Dieu a révélé, tout ce qu'il révèle maintenant, et nous croyons qu'Il révélera encore beaucoup de choses, grandes et importantes, concernant le royaume de Dieu." Depuis l'époque de leur première promulgation des Articles de Foi on été acceptés par les membres comme exposé faisant autorité; et, le 6 octobre 1890, les Saints des Derniers Jours, au cours d'une assemblée générale, réadoptèrent les "Articles" comme guide de leur foi et de leur conduite. Comme ces articles présentent des doctrines importantes de l'Eglise dans un ordre systématique, ils s'offrent d'eux-mêmes comme plan commode pour l'étude de la théologie de Jésus-Christ des Saints des Derniers Jours.

Dans cette édition, ainsi que dans des éditions suivantes, je pense de traiter nos "Articles de Foi" individuellement.

PREMIER ARTICLE DE FOI.

“Nous croyons en Dieu, le Père Éternel, et en Son Fils Jésus-Christ. et au Saint-Esprit.”

Lorsque le prophète Joseph Smith était tout jeune encore, il existait beaucoup de doctrines différentes au sujet de la nature et de la personnalité de Dieu, et de Jésus-Christ. Ces enseignements plongeaient Joseph dans la confusion, de même qu'ils nous paraissent confus et difficiles à comprendre aujourd'hui.

Joseph pria pour obtenir une réponse et il reçut la vision du Père et du Fils. Cette vision lui donna la réponse définitivement. Lorsque le prophète sortit du bosquet sacré, ce beau matin de printemps, il ne pouvait plus y avoir de doute, de malentendu. Il connaissait les faits.

Dieu possède la forme d'un homme; il parle; il entend les prières; il est bon et il se soucie des hommes; il comprend.

Dieu est-il trois personnes en une? Non! Dieu est-il sans corps, sans parties ni passions? Une fois de plus, la réponse est: Non!

L'idée que Dieu est simplement une force de l'univers, un esprit seulement, fut démolie à jamais par la vision du prophète. Joseph apprit que le Père est un personne éternel, séparé et distinct, et que Jésus-Christ, comme Dieu, son Père, est aussi un personnage distinct et séparé.

Plus tard, Joseph apprit à connaître le Saint-Esprit, lequel est le troisième personnage de la trinité: “Le Père possède un corps de chair et d'os, aussi tangible que celui de l'homme; le Fils aussi; mais le Saint-Esprit n'a pas un corps de chair et d'os, c'est un personnage d'esprit. S'il n'en était pas ainsi, le Saint-Esprit ne pourrait pas demeurer en nous.” (D. A. 130:22)

(à suivre)

Soumis par l'Ancien Toni Stone

Te Amuiraa Rahi I Tubuai.

Ua reva a'enei o Frankie, e o Leila orometua, i Tubuai i te ava'e no Tenuare na nia ia Benicia no te tanturu i te mau Amaa i reira. E mea maitai roa te mau ohipa i Tubuai i to rana taeraa'tu.

I te 1 no Eperera, ua tere atu te Paraita i Tubuai. Ua tere atoa atu te Peresideni Misioni, o Iosepha Reeder, to'na hoa, o Ruta, e e maha orometua papaa: o Maratini, Iosepha, Refa, Tihoti, e e toru orometua rave ohipa: o Amosa, Tini, e o Blue, e te tahi mau melo.

I te 4 no Eperera, ua tae atu te Paraita i Tubuai. Ua faaineinehia te hoê Oriraa Rahi i taua pô ra. Ua tae atoa'tu te mutoi Farani, to'na hoa e ta rana tamahine, e te tahi mau hoa no rapae. Ua i roa te fare putuputuraa i te mau taata, te melo e te mau taata hoi no rapae. No te rahi o te mau taata tei tae mai ua faaea noa te tahi pae no ratou i rapae i te fare, no te ore te parahiraa. Ua ori maitai te mau taata i taua pô ra, aita roa te hoê peapea i tupu. E mea nehenehe roa te mau himene a te mau pŭpŭ guitare o Tubuai e te pŭpŭ guitare o te Paraita. Ua parau atu tē Mutoi Farani i te mau orometua: "E mau taata mâ roa e te nehenehe teie mau tamaroa e te mau tamahine apî Momoni." Ua oaoa te mau taata atoa i taua oriraa râ.

I te Sabati, te 5 no Epera, ua haaputuputu mai te Autahu'araa: to Tubuai e 37, to Papeete e 2. Ua faaterehia te pureraa i raro a'e i te faatereraa a te Peresideni Misioni, e na Maratini orometua i aratai. Ua faataahia e toru tahu'a i roto i te Pŭpŭ Pesesibutero, to Ziona e 2, to Mahu 1. Ua faaite te mau Peresideni Amaa e toru no Tubuai e te haere nei to ratou mau Amaa i roto i te ohipa a te Atua. E parau mau te reira. E mea nehenehe roa ta ratou ohipa.

I muri iho i te Pureraa Autahu'araa, ua faaterehia te oro'a bapetizoraa. Ua bapetizohia e piti tamarii. I muri iho i te reira, ua tairuru mai te mau taata no te pureraa amuiraa rahi. Ua i roa atoa te fare pureraa. E mea nehenehe roa te mau a'oraa.

I te hora 2 i te avatea, ua faaterehia te pureraa amuiraa i raro a'e i te faatereraa a te Paraimere. Ua a'o mai te mau tamarii e ua himene mai ratou i te tahi mau himene huru rau: te mau himene Farani, te mau himene Tahiti e te himene tarava. E mea maitai te mau ohipa a te Paraimere. Ua oaoa roa te mau taata atoa i te himene tarava a te mau tamarii. Ua faaitoito te mau Amaa atoa i te himene tarava.

I taua pô atoa ra, ua haaputupu mai te mau taata atoa, te melo e te mau hoa no rapae. Ua huru fifi rii i taua pô ra i te mea na i roa te fare pureraa, aita e parahiraa faahou e ua tia noa te tahi mau taata i roto e i rapae atoa i te fare pureraa. Ua fatata e 300 e tiahapa taata o tei tae mai.

I te monire, te 6 no Eperera. ua faatere-faahou-hia te hoê pureraa rahi no taua mahana rahi râ. E mea navenave roa te himene tarava, te mau a'oraa. E mea maitai roa atoa te reira pureraa e tae noa'tu i te mau ohipa atoa.

I taua avatea ra, ua haere atu te Peresideni Misioni ma e haaati i te fenua. I te taime a haere ai te Peresideni ma e haaati, ua hauti te Feia Apî i ta ratou mau hautiraa popo. Ua hauti e piti pŭpŭ tamaroa, te pŭpŭ Tubuai e te pŭpŭ o te Paraita, e ua hauti atoa na pŭpŭ tamahine e piti no Tubuai iho.

I te pô ua faaterehia te Soirée, te pièce. e te cinéma. Ua tae mai paha te mau taata atoa i Tubuai. E mea nehenehe roa te mau ohipa no te Soirée e te Pièce, te mau himene a te Pŭpŭ Himene Feia Apî Tubuai. te aparima a te mau Mama Ruau e te Feia Apî, te mau pŭpŭ guitare, te himene tarava, e te Pièce a te Paraimere.

Ua oaoa te mau melo atoa i Tubuai e tae noa'tu i te tahi mau taata i rapae no teie Amuiraa Rahi o tei faaterehia i teie matahiti. Na roto i te tahoêraa o te mau melo e to ratou tauturu rahi, ua manuia roa te mau ohipa. Ua mauruuru te Misioni i te mau melo atoa o Tubuai. Ua mauruuru atoa oia i te mau taata o te hau o tei tae mai i teie Amuiraa Rahi.

Te Basileia O Te Atua.

“E mata na râ outou i te imi i te Basileia o te Atua, e te parau-tia na'na ra, e amui-atoa-hia mai taua mea ra ia outou.” (Mataio 6:33.)

Hou i to'u faahitiraa'tu i te mau parau i muri nei, e faaite rii atu vau i to'u iho huru, na mua a'e.

O vau nei, o Natai Marurai â Mahuru, e taata ia vau no te hoê Ekalesia ê atu i te Ekalesia a Iesu Mesia i te Feia Mo'a no te Mau Mahana Hopea Nei. I mutaa iho e Sanito tumu ia vau, mai to'u hui metua mai â. No te parau ra a te Fatu, mai te au i te parau tumu i nia nei, ua imi hohonu roa to'u mana'o i te Basileia o te Atua, e ua iteahia ia e au i te 39 raa o to'u mau matahiti, e ua tomo atu vau, e to'u utuafare atoa, i roto i te reira Basileia o te Atua ra, oia hoi, te Ekalesia a Iesu Mesia i te Feia Mo'a i te Mau Mahana Hopea Nei.

Teie te hoê uiraa mana'o na tatou:

Eaha te tumu i ite ai oe e, o te Basileia mau a te Atua, o te Ekalesia ia a Iesu Mesia i te Feia Mo'a i te Mau Mahana Hopea Nei?

Teie ia, maori ra e toru ia tumu rarahi, papu mau, to te reira, oia hoi:

- 1.- Te vai mau nei te Aposetolo, e te Peropheta mau.
- 2.- Te vai mau nei te Atahu'araa Mo'a.
- 3.- Te vai mau nei te heheuraa mau.

A tia mai i te tuatiraa, i mua nei, e ia ora na outou atoa i te aroha o te Atua.

Na to outou taeae i te faaroo o Marurai â Mahuru.

Te Amuiraa i Hikueru.

Te Amuiraa i faatupubhia i Hikueru, ua au ïa te reira i te hoê Amuiraa rahi Mataeinaa no te mau fenua Tuamotu. Ua tae mai, i ô nei, to Papeete, to Makemo, to Taega, to Nihiru, to Marokau, to Hao e to Hikueru iho nei hoi, e i te amuiraahia o te taatoaraa ra, na tae ïa te tai'oraa, o te mau melo, i te numera ra e 214.

Ua haamata te Amuiraa i te mahana maa, te 4 no Eperera, na roto i te hoê Oro'a faaipoiporaa no Toni Dean raua o Repeta, e teie tei fafauhia, e teie nei taata maitai, e to'na ra hoa, oia hoi, e faaoti raua i to raua Oro'a baptizoraa i roto i te tau o te Amuiraa. I te hora 7, i te po, o te mahana maa, ua faatupu te Ekalesia, na roto i te pûpû o te Feia Apî, te hoê oriraa rahi e te amuraa maa hoi. Ua rahi te mau taata tei tairuru mai no teie nei oro'a e ua hope paatoa, ratou, i te oaoa e te mauruuru hoi.

I te Sabati i te poipoi, te 5 no Eperera, i te hora 9, ua faaterehia te pureraa Autahu'araa. I roto i te reira pureraa na ferurihia te parau no te hopuraa amui, ei tantururaa i te mau Orometua rave ohipa. I te hora avatea ua ñaamatahia te pureraa, na roto i te mau tufaa ohipa na te Paraimere e ta te Feia Apî hoi. Aue te mau a'oraa, no teie nei pureraa, i te nehenehe, e i muri a'e i teie nei pureraa avatea ua haere te taatoaraa o te Ekalesia, i tabatai, i te pae miti, no te oro'a baptizoraa o Toni raua o Repeta, e ua rahi te mau taata tei tairuru mai, i tabatai, no te hi'oraa i taua oro'a ra. Na Vaio â Makitua, Peresideni Amaa, raua o Tauapiti â Mariteragi, i rave i teie nei oro'a baptizoraa.

I te hora 7 i taua po ra ua faaterehia ïa te pureraa a te mau Tuahine. Ua maitai roa te mau a'oraa, e te mau himeneraa atoa hoi, e na rahi te mau taata tei tae mai i te

reira pureraa. Ia poipoi a'e, i te 6 no Eperera, o te Pureraa rahi ia tei faaterehia. I roto i te reira pureraa ua a'o mai na Peresibutero e 15, no roto mai ratou i te mau Amaa ra. E i roto atoa i te reira pureraa ua farii-atoa-hia te mau Feia Mana faatere no te Ekalesia, i te ao atoa nei, e to te Misioni atoa hoi. Ua mairi te 100 o te mau taata tei tae mai i te reira pureraa e ua nehenehe maitai-atoa-hoi te reira pureraa.

I te hora 7 i te po, o te mau hautiraa popo Basket Ball ia tei faatupuhia i rotopu i te pūpū no Papeete e to Hikueru mau Feia Apî. Noa'tu i te maramarama ore o te mau mori, e te repo hoi o te vahi hautiraa, ua hauti maitai roa teie na pūpū e piti ra. I roto i te mau hautiraa a te mau vahine, ua pau te mau ratere i to Hikueru iho, area ra, i roto i te hautiraa a te mau tane, ua pau ia to Hikueru i to Papeete. A taa-ê-noa'tu ai te poiri o te mori, e te repo rahi, ua nehenehe roa te mau hautiraa e ua mauruuru roa te muu taata tei haere mai e mataitai i te reira mau hautiraa.

O te hopea ia te reira no te mau ohipa i ravehia, i roto i te Amuiraa, ma te maitai e te nehenehe hoi.

Taumata â Tekuravehe.



PARAU RII API

Te Tere Nei.

I roto i te Amuiraa i faaterehia i Roto Miti i te mau mahana matamua no Eperera ua faaitehia mai te buru e te tereraa o te Ekalesia i te matahiti i mairi a'enei.

Ua faaitehia e, te vai ra 1.292.098 melo i roto i te mau Titi o Ziona, e 263.701 melo i roto i te mau Misioni i te ao nei e ia amuihia te reira, e iteahia ia 1.555.799 melo i roto i te Ekalesia i te ao atoa nei. Ua faaite-atoa-hia e, 67.485 melo ia te hauraa o te meloraa i te matahiti 1957.

Ua haamaitaia 52.885 tamarii, ua bapetizohia 36.135 tamarii tei tae i te 8 o te matahiti, e ua papetizohia 33.330 taata paari i roto i te mau Titi a Ziona e te mau Misioni o te Ekalesia.

I roto i te Autahu'area te vai ra 68.838 Diakono, 56.016 Haapii, 71.993 Tahu'a, e 146.031 Peresibutero.

Ua tai'o-atoa-hia 193.553 tuahine i roto i te mau pūpū Tuahine, 566.216 taata i roto i te pūpū Haapiiraa Sabati (Moyen), 178.766 taata i roto i te pūpū Feia Apî Tane, 194.094 vahine i roto i te pūpū Feia Apî Vahine, e 290.787 tamarii i roto i te pūpū Paraimere.

I roto i te mau Haapiiraa a te Ekalesia, te vai ra 22.822 taata i roto i te mau "collèges" e 48.203 i roto i te tahi mau Haapiiraa.

Ua maiti-atoa-hia 12.823 orometua no te poro-haere raa i te Evanelia i te ao taatoa nei.

To Tatou Orometua.

E homa, e te mau taata Maohi i matau ia'u i te mau vahi ta'u i haere a faaea'i au i Polynesia Farani nei, ia ora outou e tatou atoa i te aroha o to tatou Fatu o Iesu Mesia, Amene.

Inaha, i te matahiti 1956, na tae mai te aniraa ia'u ra e, a haere i te fenua Tahiti e poro haere i reira i te Evanelia a Iesu Mesia. No reira, ua farii au i teie aniraa, e i muri'ho i to'u faataaraahia i raro a'e i te rima o te hoê Aposetolo ua tere mai au i Tahiti na nia i te hoê pahi auahi e ua taahi au i to'u avae i nia i te fenua Tahiti i te 23 no Atopa 1956.

Mai reira mai â, e rave rahi te mau fenua e te mau motu ta'u i ite na roto i to'u tonoraahia i tera vahi i tera vahi. Ua faaea vau i te pae Tuamotu i nia, te pae Tuamotu raro, Tubuai ma, Raiatea



ma, e i Tahiti nei hoi, e e rave rahi hoi te mau hoa ta'u i matau i te reira mau fenua.

I teie nei râ, te fatata mai nei te taime no to'u faarue-
raa i teie paeau no te ho'i atu i to'u fenua ai'a, no reira na roto i teie parauraa hopea, hou vau e reva'tu ai, ua hinaaro vau i te faatae i to'u aroha, to'u here e to'u mauruuru rahi i te mau taata atoa tei matau ia'u, tei tanturu mai ia'u i te mau ohipa ta'u i rave, e tae noa'tu i te mau melo o te Ekalesia nei e te mau hoa i rapae.

A haamana'o ontou i te irava i roto i te Mataio 22:36 tei na ô mai e, "E hinaaro oe i to Atua ia Iehova ma to aau

atoa, e ma to varua atoa e ma to mana'o atoa, e ma to puai atoa. O te ture matamua teie e te hau i te rahi." A faai-toito tatou i te tapearaa te tiama e ia faarue i te ino na roto i ta tatou haapao-noa-raa i te mau ture o te Ekalesia, e tae roa'tu i te taine tatou e farerei faohou ai. Ia ora na outou i te aroha o te Fatu, o Iesu Mesia, Amene.

Papaihia e Maratini Orometua. (Elder Martin W. Conover.)

Te Hoho'a No Ta Tatou Ve'a. Te Mau Fare A Te Ekalesia.

E maha mahana i muri a'e i te taeraa mai o te mau Feia Mo'a, i Roto Miti, Utaha, ua haere o Birigama Youne, e te tahi mau taata faatere o te Ekalesia, e mataitai haere i to ratou ra fenua apî, ua tuu ihora o Birigama Youne i ta'na ra turu tootoo i roto i te repo fenua, ma te parau e, "O teie ihoa te vahi e faatiahia'i te Hiero o to tatou ra Atua." I taua iho mahana ra i faitohia'i e 10 tâ "acres" fenua i ropu i te peho, ma te opua papu e, e faatiahia te oire ma te faaati i te reira vahi i maitihia no te Hiero ra. Ua patu ratou i te hoê aua no taua vahi i maitihia ra, e te hi'o nei tatou, i roto i ta tatou hoho'a, te reira vahi i to'na huru mau i teie nei mau mahana. Te hi'o nei tatou i te Hiero, te Fare Menemene, te hoê Fare haamaramaramaraa "Bureau d'Informaticn", te hoê Fare hi'oraa tauihaa tahito "Musée" e te vai atura te fare haaputuputuraa, e te tahi mau tii haamana'oraa tei ore e itehia nei i roto i te hoho'a. Ua hau atu i te hoê milioni taata "touristes", no te ao atoa nei, te tae noa mai i teie nei vahi, i te matahiti hoê, no te mataitairaa i te mau ohipa a te Haapaoraa Momoni.